

# INATSIARTUT

PARLIAMENT OF GREENLAND



Inatsisartut Siulittaasuannit  
Josef Motzfeldtimit

## NUTAARSIASSAT

Ukiup affaa kingulleq 2011



## Aallaqqaasiut

Qinigaaffimmi matumani Inatsisartut ukiut suliffiisa pingajuat aallartinneqarpoq ulloq 16. septembari 2011, sulinerlu ingerlallualeruttorpoq.

Ukiakkut ataatsimiinnerup naanerani ilisimatitsissutigaa Inatsisartuni Siulittaasoqarfimmi ataasiaannarnata paasi-simagipput ataatsimiinnerni oqaatsinik atuinerup suli oqaluuserineqarnissaa pisariaqartoq. Oqaluuserisassaq tamanna Siulittaasoqarfiup tullianik ataatsimiinneq aallartitsinnagu oqaluuserilersaarpaa. Sammisaaq taanna pitsaangorsaavigine-qartariaqartutut 2009-imi ukiup affaata aappaani nutaarsiassanili oqaatigaara, pisariaqartitsinerlu taanna minnerulersi-mangitsutut isikkoqarmat suliap tamatuma Siulittaasoqarfimmi ingerlateqqinneqarnissaa qulakkiissavara.

Taamatuttaarlu inuit pisinnaatitaaffii pillugit sulinermi tunngavigineqartunik ilaasortat paasisimasanik pissarsiaqarsin-naaqullugit inuit pisinnaatitaaffii pillugit danskit institutianni sulineq sulinerullu tamatuma Kalaallit Nunaannut sunni-utai pillugit Inatsisartunut ilaasortat oqalugiartigineqassasut ilaasortanut ilisimatitsissutigaa. Tamanna upernaakkut ataatsimiinnerup nalaani pisussatut pilersaarutigineqarpoq.

## 2011-mi Kalaallit Nunaannut Dronningip tikeraarnera

Illoqarfiiit nunaqarfiillu arlallit tikeraarlugit Ataqqinartorsuup Dronningip 2011-imi Kalaallit Nunaanni umiartornerminut atatillugu Nuummot tikinnerani Dronning Inatsisartut Siulittaasuannit aammalu Naalakkersuisut Siulittaasuannit ulloq 17. juli Hans Egedep Illuani tikilluaqquneqarpoq, tamatumani Kalaallit Nunaanni naalakkersuineri killiffik aammalu nunatsinni qanoq ingerlasoqarnera pillugit nalinginnaasumik ilisimatinneqarluni.

## Nunat Avannarliit Killiit Siunnersuisoqatigiiffiata Islandimi ukiumoortumik ataatsimiinnera

Nunat Avannarliit Killiit Siunnersuisoqatigiiffiat Islandimi Bifröstimi ulluni 22.-25. august ukiumoortumik ataatsimiip-poq. Kaammattuutit aalajangersakkat arfinillit akuersissutigineqarput, taakkulu nunat pingasuusut inatsisartuini suliarineqassallutik. Kaammattuutit aalajangersakkanit 14-iusunit tallimat ukiumoortumik ataatsimiinnermi atorun-naarsinneqarput. Tamanna imatut paasineqassaaq; kaammattuutit aalajangersakkat malinneqarsimasutut imaluunniit piviusunngortillugit aallartinneqarsimasutut Siunnersuisoqatigiinnit isigineqartut, taamaalillutik taakkuninnga suliaqar-nertik Siunnersuisoqatigiit naammassisinnaavaat kaammattuutitullu aalajangersakkat sinnerinik suliarinninnertik na-gissinnaallugu.



Nunat Avannarliit Killiit Siunnersuisoqatigiiffianni Islandimiut siulittaasuunerat ileqqoq malillugu ukiumoortumik ataatsimiinnermi naggaserneqarpoq Savalimmiunullu, Nunat Avannarliit Killiit Siunnersuisoqatigiiffianni august 2012 tikillugu siulittaasuunermik tigumminnittussamut tunniunneqarluni. Nunat Avannarliit Killiit Siunnersuisoqatigiiffiannut præsidentinngortoq tassaavoq Savalimmiut aallartitaasa siulittaasuat Kàri P. Højgaard. Taanna Savalimmiuni oktoberimi qinersinerup kingorna nunami namminerimi pissutsinut Naalakkersuisunngorpoq, taamaattumillu Savalimmiormiut aallartitaasa siulittaasortaavannit Henrik Oldimit taarserneqarluni. Tulliani ukiumoortumik ataatsimiinneq pissaaq Savalimmiuni ukioq 2012-imi.

Nunat Avannarliit Killiit Siunnersuisoqatigiiffiata sulinerata pingaernerulersinneqarnissaa, taamaaliornikkullu siunnersuisoqatigiinni nunallu akimorlugit suleqatigiinnerup nukittorsarneqarnissaa ukiuni arlalinni kissaatigineqareersoq Nunat Avannarliit Killiit Siunnersuisoqatigiiffiata ataatsimiittarnerisa siunissami aaqqissugaanissaa pillugu oqallisissiamik Nunat Avannarliit Killiit Siunnersuisoqatigiiffiata siulittaasoqarfia ukiumoortumik ataatsimiinnermi saqqummiussivoq.

Siunnersuisoqatigiit augustip qaammataani ukiumoortumik ataatsimiinnerannit aalajangersimasumik sammisaqarluni ataatsimeersuarnermi, nalinginnaasumik junip qaammataani pisartumi Siunnersuisoqatigiit naapeqqinnissaannut piffissaq sivisuallaartoq aallartitanit immikkut isiginiarneqarsimavoq. Ataatsimiinnerit qaammatinik qulingiluanik akunneqarnerisa nassatarisaanik nunat avannarliit killiit suleqatigiinnerat ukiup ilarujussuani annikitsuinnarmik ilaasortat isumaanniitarpog. Soorluttaaq Siunnersuisoqatigiit augustimi ukiumoortumik ataatsimiinnerat nunat pingasusut inatsisartuini ulapaarfiup nalaani pisartog. Siunnersuisoqatigiit ingerlatsinerata nunat pingasusut inatsisartuini sulinermut naapertuussarnissaanut periarfissat misissornerat Siulittaasoqarfimmit maanna ingerlateqqinneqassaaq. Suliaq tamanna piffissamik atuffiussaaq, tassa tamanna pillugu isummernissamat tunngavissiamik suliaqartoqaaqqaasamat, taannalu piviusunngortinneqannginnermini inatsisartuni pingasuni oqallisigineqaaqqaartussaalluni.

Nunat Avannarliit Killiit Siunnersuisoqatigiiffiata aalajangersimasumik qulequtaqarluni ataatsimeersuarnissaa tulleg pissaaq 26. – 30. marts 2012 Ilulissani. Ataatsimeersuarnermi sammineqartussaaq tassaavoq "Nunat tamalaat akornanni Nunarsuami Nunat Avannarliit inissisimanerat, Issittoq Nunanilu Avannarlerni inuussutissarsiornikkut ineriartorneq immikkut sammillugit".

Nunat Avannarliit Siunnersuisoqatigiiffiata Københavnimi ukiumoortumik ataatsimiinnerani Nunat Avannarliit Killiit Siunnersuisoqatigiiffiata nunat avannarliit killiit nunanut allanut ministeriinka ataatsimeeqateqarnerani nunanut allanut ministerit taakku uppernarsarpaat aalajangersimasumik sammisaqarluni ataatsimeersuarneq sallitutikkumallugu peqataaffigiumallugu.

## Siulittaasoqarfiup Danmarkimi attaveqaqatigiinnermut ataatsimiititaliami ataatsimiinnera

Attaveqaqatigiinnermut ataatsimiititaliami augustip naanerani ataatsimiinnissamut Folketingip Siulittaasoqarfia peqatigalugu Inatsisartut Siulittaasoqarfiat qaaqqusaavoq, ataatsimiinnissaq Ærømi pisussatut pilersaarutaavoq. Folketingimulli qinersinissaq nalunaarutigineqarmat ataatsimiinnissaq taamaatinneqarpoq.

Tassungaa taarsiullugu Folketingip Siulittaasoqarfittaava peqatigalugu Inatsisartut Siulittaasoqarfiata attaveqaqatigiinnermut ataatsimiititaliami ataatsimiinnerat ulluni 4. – 6. december ingerlanneqarpoq ataatsimiinnerlu pilersaarutaasutut Fynip kujataani qeqertami ingerlanneqarluni. Ilaatigut Marstalimi imarsionermut katersugaasivik pulaarneqarpoq. Taamatullu atuakkiortoq Carsten Jensen Ærømi imarsionermik ilisimatusarnini, atuakkiamini “Vi - de druknede” tunngavilik-kani pillugu oqalugiarluni.

Ataatsimiinneq tulles ingerlanneqassaaq Kalaallit Nunaata kujataani 2012-imi.

## Siulittaasup Islandip præsidencia naapippaa

Polar Law Symposiumimik qulequtaqartumik Nuummi nunat tamalaat ataatsimeersuarneranni peqataanerminut atatil-lugu Islandip præsidencia dr. Ólafur Ragnar ulluni 7.–9. september Nuummi tikeraarpoq, nunat tamalaat ataatsimeersu- arnerat taanna Islandimi Akureyrip Universitetiata aammalu Nuummi Ilisimatusarfiup suleqatigiinnerisigut pilersinne- qarpoq.

Præsidentip Nuummut tikeraarneranut atatillugu Inatsisartut Siulittaasuata Josef Motzfeldtip præsidenti Hans Egedep illuani ullup qeqqasioqatigaa, tamatumani Kalaallit Nunaata Islandillu ataatsimut soqutigisaasa oqaloqatigiissutigini- saat periarfissinneqarluni.

Nunat akornanni pisortatigoortumik attaveqaqatigiinnerup saniatigut ilisimatusarnikkut Islandimi Kalaallillu Nunaanni suleqatigiinnerup qaninnerulersinneqarnissaa immikkut pingaartinneqarpoq. Nunarsuatta sinnera, minnerunngitsumillu nunarsuatsinni immikkoortut nalinginnaasumik suleqatigisarsimangisavut eqqarsaatigalugit issittoq pillugu ilisimatu- sarnermut nunat taakku marluk peqatigiillutik tunniusseqataanissaat pisariaqartinneqarpoq. Nunallu taakku marluk aamma isumaqarput Kalaallit Nunaanni Namminersornerup eqqunneqarneratigut piffissanngortoq kulturikkut aammalu inuiaqatigiit nutaaliaasut ineriartortinneqarneranni minnerunngitsumillu silap pissusaata allanngoriartorneranik misilit- tagarilikkani tunngavilugit Kalaallit Nunaata nunarsuatta sinneranut tunniusseqataanissaanut.

Kalaallit Nunaata Islandillu akornanni suleqatigiinnerup inerisaqqinnissaanut annertuumik periarfissaqartoq Inatsisartut siulittaasuat Josef Motzfeldt aamma Islandip præsidencia dr. Ólafur Ragnar Grímsson isumaqarput aammalu suleqati- giinnerit pioersut suleqatigiiffissatullu periarfissat nutaat taperserumallugit. Tamanna pillugu oqaloqatigiinnerit Islandimi qanittumi nanginneqarnissaat isumaqatigiissutigineqarpoq.

## Ambassadørinik tikeraartoqarneq

Luxembourgip ambassadøria Pierre-Louis Lorenz ulluni 18.–21. oktober Nuummi tikeraarpoq, tamatumani Luxembourgip konsulia, eqqartuussissuserisoq Jens Paulsen peqatigalugu Inatsisartut Siulittaasuat ataatsimeeqatigalugu, ataatsimiinnermi Kalaallit Nunaata aammalu Luxembourgip EU-mi ilaasortatut akunnerminni attuumassuteqarfisigaasa oqaluuserineqarnissaat periarfissinneqarpoq. Periarfissaq iluatsillugu Inatsisartut ataatsimiittarfianni oqallinneq Am- bassadørip malinnaavigaa.

Minnerunngitsumik ilinniartitaanerup iluani EU-p Kalaallillu Nunaata akornanni isumaqatigiissutit ulluinnarni aqutsivigi- uminarnersut paasissallugu Ambassadørip assut soqutigaa. EU-mi ilinniarfinnik atuisinnaanermut periarfissaq ilinniartu- nit sapinngisamik pitsaanerpaamik atorluarneqarnersoq imaluunniit EU-mut isumaqatigiissut allaffissornerujussuarmik atuinngikkaluarluni pisariinnerusumik atorneqarsinnaanersoq Ambassadørip immikkut eqqumaffiginiarpaa. EU-p Kalaal- lillu Nunaata akornanni isumaqatigiissutip ilaa annertoq ilinniartitaanerumut tunngassuteqarpoq.

Taamatutaaq EU-p Kalaallit Nunaannut soqutigininnerata annertusiartornera Inatsisartut Siulittaasuata paasissutissi- issutigaa, soorluttaaq EU-mi inatsisartut takutikkaat EU-mi politikerit nunatsinni pissutsinut ilisimasaqarnerulernissaat qulakkeerniarlugu EU-mi inatsisartut nunatsinnilu Inatsisartut qaninnerusumik attaveqaqatigiillernissaat assut kissaatigi- neqartoq.

Kalaallit Nunaata nunallu allat attaveqaqatigiinnerannik pilersitsinissaq anguniarlugu politikikkullu attaveqaatit nukittor- sarumallugit Inatsisartut Siulittaasoqarfiat nunat allat inatsisartuinut paasisassarsiorluni angalasartoq Siulittaasup aamma paasissutissiissutigaa. Taama suliniuteqarneq Siulittaasoqarfimmit ingerlateqqinneqarpoq, taamaalillunilu Lu- xembourgimi inatsisartunut tikeraarnissamut Siulittaasoqarfik Ambassadørip tikilluaqqaa.

Aningaasatigut soqutigisatik pillugit ilaasortat nammineq piumassuseq naapertorlugu paasissutissiisinnaanerat



Inatsisartut ilaasortanerup saniatigut aningaasatigut aammalu inuussutissarsiutitigut soqutigisat pillugit nammineq piumassuseq naapertorlugu paasissutissiisinaanermik aqqissuussineq nutaaq ulloq 1. juni 2011-mi atuutilersinneqasasooq Siulittaasoqarfiup aalajangiuppaa.

Siuliut nutaaq taanna tusagassiorfinnit assut soqutigineqarpoq, soorluttaaq aqqissuussineq naammattutut isigineqarsinnaanersoq imaluunniit ilaasortat soqutigisaat pillugit paasissutissiissutit naammannersut arlalinnit apeqquserneqarsimasooq. Suliaq Siulittaasoqarfimmit malinnaavigineqarpoq paasineqarlunilu ilaasortat affaasa missarluinnaat paasissutissanik tunniussisimasut. Aqqissuussinnermut nammineq piumassuseq aallaaviummat aammalu pinngitsoorani atuutsinneqalissappat inatsimmik akuersissutiginninnissaq pisariaqarmat, aqqissuussinerup ukiup affaanik atuussimanagera tunngavigalugu, Siulittaasoqarfimmit paasineqarpoq aqqissuussineq ilaasortat kissaatigisartik malillugu taperseraat.

## Ukiakkut ataatsimiinneq (UKA 11)

Immikkoortunik UKA 11-mi oqaluuserineqartussatut kissaatigineqartunik tunniussivissatut killigitinneqartup kingorna ullut arfiniliinnaat qaangiuttut 2011-mi ukiakkut ataatsimiinnissamut oqaluuserisassat Siulittaasoqarfimmit ukiut aap-passaanik nassiunneqarput. Taamaalillunilu katersuunnissap aallartinnissaanut piareersarnissamut ilaasortat allattoqarfillu piffissaqarluartinneqarput.

Ukiakkut ataatsimiinnermi matumani Siulittaasoqarfik 20-riarluni ataatsimiissimavoq, UKA 2010-imi 22-riarluni ataatsimiissimalluni.

## Inersuarmi ullut ataatsimiiffiit

Ukiakkut ataatsimiinnermi matumani ataatsimiittarfimmi ataatsimiinnerit ulloq 16. september aallartipput naammasineqarlutillu 15. november. Ullut ataatsimiiffissatut pilersaarutit 23-upput, taakkuli ullunik sisamanik immikkut ataatsimiinnermik ilaneqartariaqarsimallutik, taamaattumillu UKA 11 ulluni 27-imi ataatsimiiffiusimavoq, UKA 10-imi ullut ataatsimiiffiit 23-usut.

## Akunneq Naalackersuisunut apeqquteqarfik

Inatsisartut suleriaasianni § 37 malillugu sapaatip akunneranut ataasiarluni akunnermik ataatsimik sivissuseqartumik apeqquteqartarneq ingerlanneqarpoq. Akunneq apeqquteqarfik pingasungornikkut nalunaqutaq 11.00-miit 12.00-mut ingerlanneqartarpoq, tamatumalu kingorna Inatsisartuni ataatsimiinneq nalunaqutaq 13.00 ulloq taanna ingerlanneqartarluni.

UKA 11-mi akunnerit apeqquteqarfiit 7-iupput, taamatuttaarlu UKA 10-mi amerlassuseqarlutik.

## Ataatsimiititaliat aaqqissuussaanerat nutaaq

Ataatsimiititaliat arlallit ataatsimoortinneqarnissaat Siulittaasoqarfiup ulloq 1. juni akuersissutigaa, tamannalu Siulittaasoqarfiup tallimanik ilaasortaqaqtup saniatigut ima ataatsimiititaliaqaqtumik ilaasortaqaqtumillu UKA 11-mi atuutilersinneqarpoq:

- Aningaasaqarnermut Akileraartarnermullu Ataatsimiititaliaq (ilaasortat 7)
- Nunanut Allanut Sillimaniarnermullu Ataatsimiititaliaq (ilaasortat 5)
- Kukkunersiunerumut Ataatsimiititaliaq (ilaasortat 5)
- Inatsisinut Ataatsimiititaliaq (ilaasortat 5)
- Qinigaanerup Misilinneqarnissaanut Ataatsimiititaliaq (ilaasortat 5)
- Sanaartornermut Avatangiisinullu Ataatsimiititaliaq (ilaasortat 7)
- Ilaqutariinnermut Peqqissutsimullu Ataatsimiititaliaq (ilaasortat 7)
- Aalisarnermut, Piniarnermut Nunalerinerimullu Ataatsimiititaliaq (ilaasortat 7)
- Inuusutissarsiornermut Ataatsimiititaliaq (ilaasortat 7)
- Kultureqarnermut, Ilinniartitaanerumut, Ilageeqarnermut Ilisimatusarnermullu Ataatsimiititaliaq (ilaasortat 7)

## Inatsisartut pillugit UKA11-imi inatsisit nutaat

Ataatsimiititaliat aaqqissuussaanerata nutarterneqarneranut atatillugu Inatsisartut suleriaasiat ataatsimiititalianut nutaanut naleqqussarneqartariaqarsimavoq. Allannguut annertunerpaaq tassaavoq pissutsit immikkut ittut atuutsillugit Inatsisartullu Siulittaasoqarfiata inassuteqaqarneratigut ataatsimiititaliani ilaasortassanik arfineq marlunnik Inatsisartut toqqaasinnaanerat.

Taamaalillunilu ataatsimiititalianik aaqqissuussaanerup nutaap atuutilernerani ataatsimiititaliat tallimat arfineq marlunnik ilaasortaqaalerput.

## Upernaakkut ataatsimiinneq 2012 (UPA 12)

Upernaakkut ataatsimiinnerup tallimangornermi ulloq 13. april 2012-imi aallartinnissaanik aalajangiinnermik Inatsisartut ukiaanerani ataatsimiinnertik naggaserpaat. Tamatuma kingunerisaanik suliassat upernaakkut ataatsimiinnermi (UPA 12) ilanngunneqartussatut kissaatigineqartut kingusinnerpaamik 9. marts 2012-imi tunniunneqarsimassapput.

## Inuit pisinnaatitaaffii pillugit UPA 12-imi saqqummiussissut

Inatsisartuni sulineq pillugu ilaasortat annertunerusumik paasitinneqarsinnaaqullugit qulequttat attuumassuteqartut pillugit pikkorissarnerni oqalugiarnerniluunniit peqataanissamut Inatsisartunut ilaasortat periarfissinneqassasut 2009-imi Inatsisartunut nutaamik qinersinermi Siulittaasoqarfimmit aallaqqaataaniilli aalajangiunneqarpoq. Tassunga atatillugu upernaakkut ataatsimiinneq aallarnerneqassaaq inuit pisinnaatitaaffii pillugit institutimi sulineq tassungalu ataatillugu Kalaallit Nunaannut tunngassuteqartut pillugit isumasioqatigiinnermik.

## Nersornaammik tunniussineq

2011-imi ukiup affaata aappaani Nersornaatit pingasut Siulittaasoqarfimmit tunniunneqarput. Ulloq 7. september Elisa Nuko aamma Torben Harald Alne Inatsisartut Siulittaasuannit sølviusumik Nersornaaserneqarput ullorlu 14. september Frederik Kristensen (kunngi) Inatsisartut Siulittaasuannit sølviusumik Nersornaaserneqarpoq. Nersornaammik tunniussinerit tamarmik Nuummi Hans Egedep Illuani ingerlanneqarput.

Tamassi sulilluarnissassinnik ukiumullu nutaamut iserluarnissassinnik kissaappassi.